

**Aalisarnermut aningaasaliissutitut immikkoortitat pillugit Inatsisartut inatsisaata  
allanngortinneqarnissaanut siunnersuut**

(Tapiisarnermut tunngavissanut allanngortitsineq)

*Saqqummiussisoq Aalisarnermut, Piniarnermut Nunalerinermullu Naalakkersuisoq*

**pillugu**

**Aalisarnermut, Piniarnermut Nunalerinermullu ataatsimiititaliap**

**ILASSUTITUT ISUMALIUTISSIISSUTAA.**

**Siunnersuutip pingajussaaneerreqarnerani saqqummiunneqartoq.**

Aalisarnermut, Piniarnermut Nunalerinermullu ataatsimiititaliap suliarinninnerani ilaasortat uku ilaapput:

Inatsisartunut ilaasortaq Aqqaluaq B. Egede, Inuit Ataqtigiit, Siulittaasoq  
Inatsisartunut ilaasortaq Niels Thomsen, Demokraatit, Siulittaasup tullia  
Inatsisartunut ilaasortaq Juliane Henningsen, Inuit Ataqtigiit  
Inatsisartunut ilaasortaq Hans Aronsen, Inuit Ataqtigiit  
Inatsisartunut ilaasortaq Karl Lyberth, Siumut  
Inatsisartunut ilaasortaq Hans Enoksen, Siumut  
Inatsisartunut ilaasortaq Finn Karlsen, Siumut

Siunnersuutip aappassaaneerreqarnerani inatsisissatut siunnersuut saqqummiunneqartoq Ataatsimiititaliap isumaqtigiittup akuerisassanngortippaa.

Peqatigitillugu Ataatsimiititaliap isumaqtigiittup Naalakkersuisut kaammattorpai pingajusaaneerinninnermi inatsisissatut siunnersuummut allannguutissatut siunnersuummik saqqummiussissasut, taamaalillutik aalisartut angallammik nutaanngitsumik isaterinissamut tapiissutinik qinnuteqarsimasut immaqalu aalisartut allat peqatigalugit umiatsiamik nutaamik pissarsinissamik kissaateqartut akuersissutertik pigiinnarsinnaassallugu.

Tamanna tunuliaqutaralugu siunnersuut aappassaaneerneqarmat siunnersuutip pingajussaaneerneqannginnerani Ataatsimiititaliami nutaamik suliarineqassasoq innersuussutigineqarpoq.

### **Siunnersuutip Ataatsimiititaliamit suliarineqarnera**

Ataatsimiititaliap iluarisimaarlugu maluginiarpaa Ataatsimiititaliap allannguutissatut siunnersuuteqaqqusilluni kaammattuutaa Naalakkersuisut malissimagaat. Ulloq 12. november 2011 Ataatsimiititaliaq allannguutissatut siunnersuummik tigusaqarpoq, taassumalu kinguneraa inatsimmut atuuttumut § 16a nutaaq ilanngunneqassammat.

§ 16a nutaaq pillugu Naalakkersuisut allannguutissatut siunnersuutaat saqqummiunneqartoq Ataatsimiititaliap isummorsorfigaa, siunnersuummullu ima oqaasissaqarluni:

Ataatsimiititaliap maluginiarpaa isaterinermut tapiissutinik tunniussinermut tunngavilersuut pingaaruteqartoq tassaasoq angallatit pisoqalisimasut ullutsinnullu naleqqukkunnaartut qaqugumulluunniit aalisarunnaarsinneqarnissaat, taamaaliornikkut aaqqissuussaaneermik naleqqussaaneermut aalisariutillu ikilisarnerannut aalisarnermi pisariaqarluinnartumut ilapittuutaassallutik. Taamaattumik angallataatilinnut qaququmulluunniit aalisarunnaarniartunut taarsiutitut aningaasatigut iluaqutissiissummik inatsimmi ilanngussisoqarpoq.

Siunissami isaterinermut tapiissutinik akilerneqarnermut atatillugu Ataatsimiititaliaq isumaqarpoq aalisarnermut akuersissutip akuersissutillu allat pigiinnarnissaat periarfissaassasoq. Pingaartumik Ataatsimiititaliaq isumaqarpoq angallatinik mikinernik pigisaqartut arlallit angallataataat isarterneqareerpata kattullutik angallammik nutaamik, anginerusumik imminullu akilersinnaanerusumik pisaarniarneranni tamanna periarfissaasariaqartoq.

Taamaattorli Ataatsimiititaliap kissaatigaattaq inuup ataatsip angallat nutaanngitsoq isatertikkuniuk kisimiillunilu piginnittutut angallammik nutaamik imminut akilersinnaasumik pisaaruni, aalisarnermut akuersissutit akuersissutillu allat pigiinnarsinnaanerannut periarfissaq ammaananeqassasoq.

Ataatsimiititaliaq isumaqarportaaq angallatip nutaajusup toqqaannartumillu umiarsualiorfimmit nioqquteqartartumilluunniit tunniunneqartussaaneera pinngitsoorani pisariaqartuusariaqanngitsoq. Ataatsimiititaliaq isumaqarpoq tunngaviatigut angallat nutaajussasoq, kisiannili aamma angallammik nutaajunerusumik angallammut nutaaliamut ingerlalluartumullu piumasaqaatinik naammassinnissimasumik pisaarnissamut periarfissiisoqartariaqartoq. Tamatumunnga atatillugu Ataatsimiititaliaq isumaqarpoq

angallatinut nutaajunerusunut siuliani taaneqartut angallatinut nutaanut naapertuussinnaasunik Naalakkersuisut erseqqinnerusunik piumasaqaasiortariaqartut, taamaalilluni inatsisip sanioqqunneqarsinnaaneranut siunertaq pinngitsoortinneqarluni.

Tamanna tunngavigalugu Ataatsimiititaliap piumasaraa 2012-mi upernaakkut katersuunnermut Ataatsimiititaliap kissaataanut naapertuuttumik Naalakkersuisut allannguutissatut siunnersuusiussasut.

**Allannguutissatut siunnersuutip allaffissornikkut aningaasarsiornikkullu sunniutissai:**

Naalakkersuisut naatsorsuutiginnilaat allannguutissatut siunnersuut saqqummiunneqartoq pisortanut allaffissornikkut aningaasatigullu sunniuteqassasoq.

**Ataatsimiititaliap inassutai**

Ataatsimiititaliap isumaqatigiittup allannguutissatut siunnersuut pingajussaaneerinermi saqqummiunneqartoq itigartinneqassasoq **inassutigaa.**

Ataatsimiititaliap isumaqatigiittup inatsisissatut siunnersuut pingajussaaneerinermi isikkumisut akuerineqassasoq **inassutigaa.**

Ataatsimiititaliap isumaqatigiittoq peqatigitillugu 2012-mi upernaakkut katersuunnermut atatillugu inatsisissatut siunnersuummut Naalakkersuisut allannguutissatut siunnersuummik saqqummiussissasut **kaammattuuteqarpoq**, tassani angallammik piginnittoq angallatip isaternissaanut tapiissutinik qinnuteqarneranut peqatigitillugu aamma nutaamut imaluunniit tassunga atatillugu angallammut taamaaqataanut qinnuteqaammik nassiussisimappat aalisarnermut akuersissutip akuersissutillu allat piginnittumit pigiinnarneqarsinnaanerata ammanneqassalluni.

Aqqaluaq B. Egede  
Siulittaasoq

14.november 2011

UKA 2011/104

Niels Thomsen  
Siulittaasup tullia

Hans Aronsen

Juliane Henningsen

Karl Lyberth

Finn Karlsen

Hans Enoksen